

Dîyi Dya Nzambi Ndilwe Kudi Muprofeta William Marrion Branham

“Angata Kasala Keebe Ufunde”

Bufuku kampanda pamvwa munkaci mwa kukeba Mukalenge, ke Nyuma Muwimpè kungambila bwa ngangate kasala kaanyi mfunde. Ndi mwenze anu nkwata kasala bwa kufunda, Nyuma Wende kumpaye mukenji kampanda wa kwambila ekeleeziya. Ke undi muswe kunutwadila ewu. Udi utangila Dîyi ne mukaji musela.

Cindi nditacisha bwa kunwambila ncyoci eci. Mukenji wa divulangana udi ne, cintu cyônsò cidi civulangana bilondeshile mushindu waci, anu mudibi mu Genese 1.11 ne: “Ke Nzambi kwambaye ne: Buloba butolweshe mashinda, ne bisoosa bidi byela mamiinu, ne mucu wa bimuma udi ukwama bimuma bilondeshile mushindu wawu, udi ne mamiinu munda mwawu, pa buloba: ne byakenzeka nanku awu.” Mwoyi wônsò uvwa mu dimiinu wakapatuka e kubwela mu mucu ne kubwela mu cimuma. Mukenji wowo umwewumwe ewu udi utangila ekeleeziya leelu ewu. Dimiinu dyônsò dyakabanga ekeleeziya nedipatuke ne nedifwanangane ne dimiinu dya ku cibangidilu, bwalu ndimiinu dimwedimwe adi. Mu matuku aa a kunshii kidilu, Ekeleeziya Mukaji Musela mulelela (dimiinu dya Kilisto) neafike too ne ku Dibwe dya Mûsongà, ne neikale ekeleeziya wa kumutu kwa mikwabo, cisa cya kumutu kwa bikwabo, padiye wenda usemena pamwe Nende. Aba biikala mu mukaji musela nebatambe kufwanangana Nende mu mushindu wa ne, nebafike ku diikala mu cimfwanyi Cyende mene. Mbwa kwikalabo baswikakane Nende mu bwobumwe. Bôbo nebiikale umwepele. Nebiikale dimweneshiibwa diine dya Dîyi dya Nzambi udi ne mwoyi. Mangumba kaena mwa kwenza cyôci eci nansha (dimiinu dya mashimi). Neapatule twitabaayi yawo ne mēyi awo maswika, bisambakaja ne Dîyi. Disopakaja dya mamiinu edi didi ditwala cipeta cisambakaja.

Mwana ba balume wa kumpala (Adama) wakadi dimiinu-Dîyi dya Nzambi dyakula. Baakamupa mukaji musela bwa kuvulanganaye. Ke cyakamupeelabo mukaji musela, mbwa kuvulanganaye; bwa kupatulaye mwana wa balume mukwabo wa Nzambi. Kadi mukaji ewu wakadishinda. Wakadishinda ku disopakaja dya mamiinu. Wakafikisha mulume ku difwa.

Mwana wa balume mwibidi (Yesu), mwikale pende Dimiinu-Diyi dya Nzambi dyakula, baakaMupa mukaji musela anu mwakapabo Adama. Kadi kumpala kwa Yeye kumusela, yeye ewu wakadishinda pende. Yeye, anu bu mwakadi mukaji wa Adama, wakeediibwa diteeta bwa kumona ne uvwa mwa kwitabuuya Diyi dya Nzambi kwikalaye ne mwoyi anyi, anyi kwela Diyi mpata kufwaye. Wakeela mpata. Wakashiya Diyi. Kufwaye.

Ku kasumbu kakese kaa mamiinu malelela a Diyi, Nzambi nealeeje Kilisto mwikale ne mukaji musela munanga. Yeye ewu udi virgo wa Diyi Dyende. Yeye udi virgo bwalu ki mmumanyeku twitabaayi anyi mayi maswika madifumbila kudi bantu nansha. Ku bidimba bya mukaji musela ne kupicila kudibo ke kwikala mwa kukumbajiibwa byonsò byakalayabo kudi Nzambi bwa kumwenshiibwabi patooke mu virgo ewu.

Diyi dya mulayi dyakalwa kudi virgo Mariya. Kadi Diyi dya mulayi adi divwa n'Yeye, Yeye mwine, bwa kumwenshiibwaye patooke. Ke Nzambi kumwenshiibwaye. Yeye, Yeye mwine, wakenza mu cikondo aci ne wakakumbaja Diyi Dyende sungasunga dya mulayi munda mwa virgo awu. Mwanjelo ngwâkamutwâdila mukenji ewu. Kadi mukenji awu wa mwanjelo uvwa Diyi dya Nzambi. Yeshaayi 9:6. Yeye wakuuya pa dibâ adi byonsò byakafundiibwa bwa bwalu Bwende bwalu wakiitaba Diyi Dyende dimutwadila.

Bidimba bya mukaji musela virgo, bôbo nebaMunange, ne nebiikale ne bintu bidi byenza dikumbanyina Dyende Yeye, bwalu Yeye udi mutu wabo, ne bukookeshi bwonsò budi m'Bwende Yeye. MbaMukookele anu mudi bidimba bya mibidi yetu biikale bikookela mitu yetu.

Monaayi bimpè dipetangana dya Taatu ne Mwana. Yesu kavwaku wenza cintu nansha cimwe pavwa Taatu kayi mwanji kuMuleejaci dyambedi nansha. Yone 5.19. Dipetangana edi ndidi ne cya kwikalaku mpindyewu pankaci paa Mubaki ne Mukajende musela. Udi umuleeja Diyi Dyende dya mwoyi. Yeye udi udyakidila. Katu udyelaku mpata nansha kakese. Ke bwa cinyi, cintu nansha cimwe kacyna mwa kumwenzela bibi, nansha lufu lwine. Bwalu dimiinu dyodi diikale dikunyiibwe, mayi neaditolweshe cyakabidi. Munsonkontu wa bwalu ebun gwewu. Diyi didi munda mwa mukaji musela (anu muvwadi munda mwa Mariya). Mukaji musela udi ne meeji a Kilisto bwalu mmumanye cidiiYe muswe bwa benzè ne Diyi. Udi utumikila ku cikemu cya Diyi mu dina Dyende bwalu udi ne "emu mmudi Mukalenge wamba." Pashiishe Diyi didi divwijiibwa

ne mwoyi kudi Nyuma ne didi dikumbana. Anu mudi dimiinu didi dikunyiibwe ne didibo beela mâyi, didi difika too ne ku dinowa mu kaabujima, diikale dikumbaja kaadi kiipacila.

Aba badi mu mukaji musela badi benza anu diswa Dyende. Muntu nansha umwe kâna mwa kubenzeja mushindu mukwabo nansha. Anyi badi ne “emu mmudi Mukalenge wamba” anyi badi bapuwâ vii. Mbamanye ne, bidi ne cya kwikala Nzambi mwikale wenza byenzedi munda mwabo, mwikale uuja Diyî Dyende sungasunga. Yeye kaakajikija mudimu Wende wônsò pavwaye mu mudimu Wende wa bwambi pa buloba to, nenku mpindyewu ewu Yeye udi wenzela mudimu mu mukaji musela ne kupicila ku yeye. Mukaji Musela mmumanye cyoci aci, bwalu dibâ kadivwa dyanji kukumbana dya Yeye kwenza bîngâ bintu bidiYe ne cya kwenza mpindyewu nansha. Kadi Yeye neûjê mpindyewu mu mukaji musela wowo mudimu awu wakashiyaYe bwa cikondo eci cisunguluke.

Bwa mpindyewu, twimanaayi bu mwakiimana Yoshuwa ne Kaaleba. Bwetu buloba bulaya nyewu bukaadi bwenda bumweneka anu muvwa bwabo paabo bumweneke. Nenku ewu, Yoshuwa mbwena kwamba ne, “Yehovah Musungidi,” ne yeye udi cimfwanyi cya mulombodi wa ku cikondo cya kunshiikidilu wîkala mwa kulwa kudi ekeleeziya anu bu muvwa Pôlò mulwe bu mulombodi wa nanzanza. Kaaleba udi cimfwanyi cya aba baakashaala ne lulamatu kudi Yoshuwa. Vulukaayi ne, Nzambi wakabanga ne Izaleela bu virgo mwikale ne Diyî Dyende. Kadi baakakeba cintu kampanda cya cishiilangane. Ke mwakenza ekeleeziya wa dituku dya kunshiikidilu. Monaayi bîmpè muvwa Nzambi kayi mujuule Izaleela bwa kwasaye lwendu, anyi kayi mumulekele bwa kubwelaye mu buloba bulaya too ne paakakumbana dibâ Dyende divwaye mudikosele. Mpindyewu bantu abo bavwa mwa kwikala banyoomakaje Yoshuwa, mulombodi, bamba ne: “Buloba mbwetu twetu, lekela tuye tûkabwângatê. Yoshuwa, wewe’s ukaadi mushiikile yônsò, udi ne cya kwikala mumane kujimija mudimu mukutuma nawu, kucyena ne bukole bûvwâ naabu pa ciibidilu nansha. Wewe’s uvwa ne ciibidilu cya kuumvwa diyî dya kudi Nzambi ne kumanya diswa dya Nzambi, pashiishe wenza maalu ne mitalu. Kukaadi katanyi mu wêwè.” Kadi Yoshuwa ke uvwa muprofeta mutuma kudi Nzambi ne uvwa mumanye milayi ya Nzambi, nenku yeye uvwa uyindila yôyi. Uvwa windila dipangadika ditooke ne dijaalame dya kudi Nzambi, ne pavwa dibâ dilwa dya bôbò kujuukabo, Nzambi uvwa uteeka bulombodi bwônsò nkoong mu byanza bya Yoshuwa bwalu yeye ngwakashaala ne Diyî. Nzambi uvwa mwa kweyemena Yoshuwa,

kadi kî mbakwabo abo nansha. Nenku bwalu ebu nebwenzeke cyakabidi mu dituku edi dya kunshiikidilu. Lutatu lwa mwomumwe, tunyoomanyooma twa mwomumwe.

Angataayi cileeji lu citudi tumona mu Mòsà. Muprofeta wa bukole moolaaba wa Nzambi ewu wakalediibwa dilediibwa dya pabwadi, mulediibwe anu pa dîbà divwa dikengediibwa bwa disungidiibwa dya dimiinu dya Abraham ku bupika bwa Ejipitu. Yeye kaakashala mu Ejipitu bwa kukokangana naabo pa Mifundu nansha kakese, anyi kubanga bilumbu ne baakwidi. Wakaya mu cipeela too ne paakafikabi ne, cisamba ciikalè cidilongolole bwa kumwakidila. Nzambi e kubiikilaye Mòsà mu cipeela. Dijanguluka kadivwa difumina kudi Mòsà nansha, kadi kudi cisamba civwa kacyi cidilongolole bwa kumwakidila. Mòsà yeye uvwa ucinka ne, cisamba necifike anu ku dyumvwa, kadi kacyakumvwa to.

Pashiishe kudi Eliya, kudiye nkwakalwa Dîyi dya Mukalenge. Paakamanaye kuyiisha bulelela, ne pavwa musumba awu wa cikondo aci uvwa mudyanjididi wa musumba wa Izabela wa cyena Amerike kabayi bananga bwa kwakidila Dîyi, ke Nzambi kumubiikila bwa kuumukaye mu budimi bwa bwambi, ne wakakengesha lukongo alu ne bipupu bwalu lwakabenga muprofeta ne mukenji uvwa Nzambi mufile. Ke Nzambi kumubiikilaye mu cipeela, ne yeye kaakaswa bwa kupatukamu to nansha bwa kwitaba ku dibiikila dya mfumu. Aba baakateeta bwa kumufikisha ku dyumvwa bwa kupatukaye, baakafwa. Kadi Nzambi wakayiikilangana ne muprofeta Wende wa lulamatu ku cikeena-kumona. Wakapatuka mu mwaba uvwaye musokome, ne wakatwadila cyakabidi Izaleela Dîyi.

Pashiishe kwakalwa Yone Mubatiiji, mudyanjididi wa lulamatu wa Kilisto, muprofeta wa bukole wa mu dituku dyende. Yeye kaakaya ku cilongelu kuvwa tatwëndè mulongele nansha, anyi ku cilongelu cya Bafaalese — kaakaya ku dingumba nansha dimwe to, kadi yeye wakapatuka e kuya mu cipeela, mwine amu bamubiikilemu kudi Nzambi. Wakashaalamu too ne paakamupatula Mukalenge e kumutuma ne mukenji, wela lubila wamba ne: “Maasiya ukaadi pabwipi.”

Mpindyewu, twänji twangataayi didimwija dya mu Mifundu mwaba ewu. Kacivwa mmu matuku a Mòsà uvwa Nzambi mushindike mwakajuuka Kòlà bwa kukandameena muprofeta awu wa bukole anyi? Wakakokangana ne Mòsà, ulaka mukana wamba muvwaye pende ne bukole bwa kudi Nzambi bwa kulombola cisamba ne buvwa bakwabo baabanyangane mu dibuulula dya kudi Nzambi anu bu muvwa naabu Mòsà amu. Yeye wakabenga kwitaba

bukookeshi bwa Mòsà. Aapu nanku awu, bantu baa cikondo aci, paanyima paa bamane kuumvwa Dîyi dilelela ne bafike ku dimanya bwalu bwa ne muprofeta mulelela nguvwa mushindikiibwe kudi Nzambi, mêmè ndi ngamba ne, bantu abo baakatwa ku cya Kòlà ne mēyi ende avwa alwisha bulelela awu. Kòlà kavwa muprofeta wa mu Mifundu nansha, kadi ciibungi cya bantu pamwe ne balombodi baabo baakatwa ku cyende. Abi's mbifwanangane ne bya batangadiki baa leelu ewu ne malongolodi abo a kânà kaa ngombe kaa ngòlò bu kaa Kòlà. Badi bamweka balengele kumpala kwa bantu anu bu muvwa Kòlà mumweke cikondo aci. Badi ne mashi pampala paabo, maanyi mu byanza ne mabulu a midilu ku cyambilu. Badi biitabila bakaji bwa kwikalabo bayiishi, balekela bakaji bakosa nsuki, bavwala mipanu ne tuputulu, ne badi bacinguluka Dîyi dya Nzambi anu bwa twitabaayi yabo ne mēyi abo maswika bidibo badyēnzèle. Aci's cidi cileeja mushindu wa dimiinu didi munda mwabo. Kadi kî mbantu bònsò baakasalula Mòsà ne baakalekela Dîyi dya Nzambi nansha. To. Basungula baakashaala nende. Cintu cya mwomumwe eci cidi munkaci mwa kwenzeka kabidi leelu wa ndaaya ewu. Baabungi badi balekela Dîyi kadi bakwabo badi bashaala naadi. Kadi nwavulukaayi lusumwinu lwa blé ne lupela. Lupela ludi ne cya kuswikiibwa tusumbu tusumbu bwa kwoshiibwalu. Ekeleeziya mipambuke eyi idi munkaci mwa kwenda kuswikakana menemene pamwe ku kakese ku kakese, yenda idilongolola ku midilu ya dinyooka dya kudi Nzambi. Kadi blé yeye nebamungangishe bwa kuteekiibwaye pamwe ne Mulongeshi Munene.

Mpindyewu ndi muswe nwikale ne ntema yabungi mwaba ewu bwa nūmvwè bwalu ebu. Nzambi mmulaye ne, ku cikondo cya kunshiikidilu, Maalaki 4 neulè. Udi ne cya kuula, bwalu n'Dîyi dya Nzambi divwijiibwe ne mwoyi kudi Nyuma, dyakula kudi muprofeta Maalaki. Yesu wakaditeela. Mpabwipi menemene ne Kilisto kulwaye bwa musangu mwibidi. Dîbà diikala Yesu ne cya kulwa, Mufundu ne Mufundu wònsò newikale ne cya kwikala mûle. Cipungu cya baa Bisamba bya Bende neciikale mu cikondo cyaci cya ndekeelu cya ekeleeziya paalwa musanjeela mwine wa Maalaki awu. Yeye neikale mulamatangane anu menemene ne Dîyi. Neangate Bible yònsò nkòòng, kuumukila ku Genese too ne ku Bwakabuulwibwa. Neabangile ku dimiinu dya nyoka ne neatungunuke too ne ku musanjeela wa mvula mishiishe. Kadi nebamubenge kudi mangumba.

Yeye udi ne cya kubengiibwa, bwalu aci ke maalu malonda a kubangila ku cikondo cya Aakaba munkaci mwa dyenzeka cyakabidi. Maalu malonda a Izaleela wa mu bukookeshi bwa Aakaba nyewu adi munkaci mwa dyenzeka muneemu mu Amerike

emu menemene mudi muprofeta wa Maalaki umwenekela. Anu bu muvwa Izaleela muumuke mu Ejipitu bwa kukuukwila biikale mu budishikaminyi, kwipatabo beena kalaba, kwibakabo ditunga diikale ne balombodi banene bu Davidi, ne bakwabo, pashiishe kuteekabo Aakaba mu nkwaswa wa butumbi mwikale ne Izabela paanyima pende bwa kwikalaye ulombola, ke mudibi ne, tudi peetu benze cintu cimwecimwe aci mu Amerike. Bankambwa beetu baakamwangala e kulwa mu buloba ebu bwa kukuukwilabo ne kusombabo biikale mu budishikaminyi. Ke bôbo kusaka beena kalaba, kadi kunyenga buloba. Bantu baa makanda, bu mudi Washington ne Lincoln, baakajuuka, kadi paanyima paa matuku, bantu baa ngiikadilu wa tulendalenda baakapingana bantu aba baa bujitu, mu mushindu wa ne, abidi mmale asatu mmîpi, Aakaba kampanda wakateekiibwa mu nkwaswa wa butumbi mwikale ne Izabela paanyima pende bwa kwikalaye umulombola. Mmu cikondo bu cyoci eci mudi musanjele wa Maalaki ne cya kulwa. Pashiishe mu mvula mishiishe nekulwe diteetangana dya makanda dya ku Mukuna wa Kaameele. Tabaleelaayi bwalu ebu ne ntema yônsô mpindyewu bwa nweni kubumona munda mwa Dîyi. Yone uvwa mudyanjididi wa Maalaki 3. Yeye wakakuna bwa mvula ya mbwa, kadi kumubengabo kudi malongolodi a mu dituku dyende. Ke Yesu kulwa e kwenzaye diteetangana dya makanda dya ku Mukuna wa Dikudimuka dya Mpala. Mudyanjididi mwibîdi wa Kilisto neakune bwa mvula mishiishe. Yesu ke wîkala diteetangana dya makanda pankaci paa mangumba ne twitabaayi, bwalu Yeye nealwe bwa kutwa Dîyi Dyende nyama ku mikolo ne bwa kwangataye mukaji musela Wende mu dyambwibwa. Diteetangana dya makanda dya kumpala divwa m'Mukuna wa Kaameele; dibîdi divwa m'Mukuna wa Dikudimuka dya Mpala, ne diisâtû nediikale Mukuna wa Siona.

Ngenzeli wa maalu wa pabwende uvwa nende Môsà, Eliya, ne Yone, wa diditapulula ne bantu ne diditola, ngenzeli wa maalu awu uvwa ushiya bantu baabungi kabayi babyumvwa to. Kabavwa bafika ku dyumvwa ne civwa mbwalu mikenji yabo ivwa anu ibengiibwa to. Cibî, dimiinu dikaavwa dimane kukunyiibwa, mudimu wa dikuna ukaavwa mumane kujika. Dinyooka divwa dilonda. Bôbô bakaavwa bamane kukumbaja kaabo kiipacila bu cimanyinu kudi cisamba, nenku dinyooka ke divwa dilonda.

Mêmè ndi ngitabuuja ne, bilondeshile Bwakabuulwibwa 13.16, mukaji musela nênzejiibwè bwa kwimanyika kuyiisha, bwalu nyama wa lwonji nênzejè anu bwa kwikala ne cimanyinu pa cyanza anyi pampala bwa kufilaye dyanyisha dya kuyiisha. Mangumba ôwô

neangate cimanyinu aci, patupu nebabēnzèjè bwa kwimanyikabo kuyiisha. Pashiishe Mwana wa Mukooko neavwile mukaji musela Wende ne nealumbulwishe ndumba munene.

Mpindyewu, vulukaayi ne, Mòsà wakalediibwa civwa mbwa mudimu kampanda musunguluke, kadi kavwa mwa kwenza mudimu awu pavwaye kayi mwanji kupeta mapà avwa mwa kumupa bukole bwa kwenza mudimu awu to. Byakakengela ne, apatuke aye mu cipeela bwa kwindila mwòmò amu; Nzambi uvwa ne cikondo civwaye mudikosele. Bivwa bikengela ne, kwikale Pâlò kampanda mu nkwaswa wa butumbi, ne bivwa bikengela ne, bantu biikale munkaci mwa dyela mbila balomba dyâmpà dya mwoyi, kumpala kwa Nzambi kumupingajaye. Bwalu ebu mbulelela bwa dituku dyetu twètù edi.

Kadi citudi naaci mu dituku dyetu edi ncinyi? Misumba ya bantu idi munkaci mwa kwenza bimanyinu bifike too ne mu mushindu wa ne, twâpeçi lukongo lwa bakebi baa bimanyinu badi bamanye kakesee anyi kabayi bamanye kantu nansha kamwe to pa bidi bitangila Dîyi, anyi pa bidi bitangila nkwaka mulelela wa Nyuma wa Nzambi. Padibo bamona mashi, maanyi ne mudilu, aapu kaayi badi basanka; cidi mu Dîyi kaciyena ne mushinga to. Bôbò nebatwe cimanyinu kana cyônsò nyama ku mikolo, nansha bidi kabiyi bya mu Mifundu. Kadi Nzambi mmutudimwije pa bidi bitangila bya nanku awu. Mmwambe mu Mataayi 24 ne, mu matuku a kunshiikidilu, nyuma ibidi eyi neikale mitambe kutwangana nkundu mu mushindu wa ne, anu basungula menemene ke baamanya mwa kuyitapulula, bwalu anu bôbò nkaayaabo ke biikala kabayi mwa kuseeswishiibwa.

Mmushindu kaayi ûdi mwa kutapulula nyuma eyi? Mpa kuyeela anu diteeta dya Dîyi. Yôyi kayiyi yamba Dîyi adi to, nanku nnyuma ya mubi. Anu mwakaseeswisha mubi bakaji basela babidi baa kumpala, yeye neēnzè ne mwende mwônsò bwa kuseeswisha mukaji musela wa ku dituku edi dya kunshiikidilu pa kuteeta mwa kumufikisha ku didisopakaja ne twitabaayi, anyi anu pa butôkà nunku ewu ku dyela Dîyi nyima bwa kukeba cimanyinu cyônsò naka cidi cikumbanangana ne dyende dimona. Kadi Nzambi Yêyè katuku mteeke bimanyinu kumpala kwa Dîyi nansha. Bimanyinu mbidi bilonda Dîyi paanyima, anu muvwa Eliya mwambile mukaji awu bwa kwanji kumwoshilaye yêyè dyâmpà dyambedi, bilondeshile Dîyi dya Mukalenge. Paakenzaye muvwa Dîyi dyambe, cimanyinu cya bushuwa cyakalwa. Anji fika dyambedi ku Dîyi, nenku pashiishe utangile bishima. Dimiinu-Dîyi didi dikoleshiibwa kudi Nyuma.

Musanjeela mutuma kudi Nzambi, nansha yêyè bamwamba ne ngwa bishi, mmunyi mudiye mwa kwitabuujja anu katupa kaa Dîyi

kadi kubenga kwitaba ndambu mukwabo wa dyôdi adi? Muprofeta mulelela wa Nzambi mu dituku edi dya kunshiikidilu neajikule Diyî mu kaabujima kaadi. Mangumba neamukine. Mèyi ende adi mwa kwikala mûme cyoncyoncyo anu bu muvwa a Yone Mubatiiji wâkabâpa dinà dya nyoka ya ntooka. Kadi aba badi badyanjila kulongolola bôbô, nebûmwè ne nebadilongolole ku dyambwibwa. Dimiinu dya Bumfumu dya Abraham, biikale ne diitabuuja dya bwena dya Abraham, nebalamate ku Diyî pamwe nende, bwalu bakaavwa badyanjila kulongolola bônso dyacimwe.

Musanjeela wa dituku dya kunshiikidilu neamweneke mu cikondo cidi Nzambi mudikosele. Ke cikondo cya kunshiikidilu eci mpindyewu bu mudi bônso bamanye, bwalu Izaleela ukaadi mu buloba bwende. Pa dibâ kana dyônso mpindyewu ewu, yêyè nealwe bilondeshile Maalaki. Patwamumona, neikale mudifile ku Diyî. Nebiikale bamufunkune (bamwambe mu Diyî, Bwakabuulwiba 10.7) ne Nzambi neashindike mudimu wende wa bwambi. Yêyè neayiishe bulelela anu bu mwakayiisha Eliya, ne neikale mudilongolole ku diteetangana dya makanda dya ku Mukuna wa Siona.

Baabungi nebamumvwe bibi bwalu mbalongeshiibwe Mifundu mu mushindu kampanda udibo bôbô bamona ne mbulelela. Paalwaye bwa kulwisha cyôci aci, bôbô kabaakwitabuuja to. Nansha bamwe bayiishi balelela nebûmwè musanjeela ewu bibi bwalu bintu byabungi bikaadi bibiikidiibwe ne mbulelela bwa Nzambi kudi baseeswishi.

Kadi muprofeta ewu nealwe, ne anu bu muvwa mudyanjididi wa dilwa dya kumpala mwele lubila ne: “Tangilaayi Mwana wa Mukooko wa Nzambi udi uumusha mpekaatu ya baa pa buloba,” nansha yêyè pende, kakuyi mpata, neèlè lubila ne: “Tangilaayi Mwana wa Mukooko wa Nzambi udi ulwa mu butumbi.” Yêyè neenzè cyôci eci, bwalu anu bu muvwa Yone mwikale musanjeela wa bulelela kudi basungula, nansha yêyè ewu pende neikale musanjeela wa ndekeelu kadi Mukaji Musela musungula ne mulediibwe ku Diyî.

(Byangata mu *Dilongesha Pa Bikondo*
Mwandamutekete Bya Ekeleeziya)

CILUBA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, Jeffersonville, Indiana 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org